

www.BibleForChildren.org

Aba Vatowo 3




E korotoyana monena tomota
liliudi unadi, tauna ivayou Ivi.



E moteta tonuwosinapu gagaina.
Nakae woiwoi madabokidi Yaubada
iwoodugudi ikalisavedi. Tauyana ima
vavina ilatuwoko idigo kana, 'Iyaa!
Moitamo Yaubada idigodigo bego
alova keuwoidi madabokiidi tánuwo
sinaena taabu kookanīdi, ae?'



Go kina vavinayana
idigo kana, 'Geya!
Tánuwo alovaiddi
keuwoidi mama tagona
kakanidi go, Yaubada alova tayamo
isanabode idigo kana, "Alova tánuwo
nauyayanaina, e keuwoina taabu
kokanikāni be nakae taabu
kobiisikōne, govila
bei kokámasa."



Go kina
motetayana
idigo kana, 'Geya
kokamasete. Geya
toina! Moitamo.

Yaubada iyagoi neta keuwoinayana
kokani, nukotomi ikipolaledi, e komi
Tauyana nakae, dedevina
be goyo koyagoidi.'



Tuwo vavinayana ikandolaga alova
keuwoina igite bego ana kaigigita
dedevina. Aiyuwoina nakona ana
káika dedevina be ana kaikayana goi
itoboine nanamsa ibabane, tauna
iyale. Tuwo moitamomo
keuwoina tayamo
iguwe, e ikani.
Ikavava, monena
nakae tayamo
ivini ikani.



Sikani ikavava, mainao adi
taiyuwokova nukotodi ikipolaledi,
tauna siyagoi sipawaku. Tuwo lao
vagana siguledi, sigilumidi adi
tabodaboda.





Ago Yauwe Yaubada korotoyana itumadade idigo kana, 'Kom nakoim?' 'Tánuwo goi aem butukáona anove go, apawaku, tauna amatoita, tuwo avatamtamumuyem', korotoyana kaena.





Go Yaubada idigo kana, 'Avatau ilatuwokoim bego kom kupawaku? Manakae? Alovayana keuwoina asanaabodem bogina kukani?'



'Vavinayana boi kuuvinigu, alova
keuwoina ivinigu akani', korotoyana
kaena. Tuwo Yauwe Yaubada
vavinayana ilatuwoko idigo kana,
'Iyaa! Kaga unana moe nakae
kuguinuwe?' 'Moteta ikatubaugu,
akani', vavinayana kaena.



E tuwo moitamo tánuwo Ideni
goi ivalilivedi sina go, Adama
poyapoya goi bei ibágula. Ego
amo poyapoyayana goi boi
Yauwe koroto iwodugu!





Tuwo ivatapiyedi ikavava, e tanuwoyana
Ideni ana kaba siu goi moe bomatu
dadavina iyatoidi. Tayamo sisi yeu
sabeninimina iyato go, sisiyana
ikaivivilo bego aba siu itubode.





Moe dogoiyadi iyatoidi bego
geya vatau tayaamo bei
tanuwoyana goi isiu ina yawana
vata alovaina keuwaina ikabi,
ikani.




E kina go Adama monena Ivi taiyao simasisi,
ikéuwama go, niga ivenátuna, natuna koroto. Tuwo
idigo kana, ' ina vaita goi natugu bogina ababane.'
Taunanatunayana ivayou Keni. Niga aiyuwaina
ivenátuna, natuna koroto moe Keni
siyana yoina Ebeli.



Sikaiyaka, gogómana sibíbina gagaidi. E kina go
Ebeliyana yoguyogu sipi ana tomatakavata go, kina
Keniyana tobágula.




E niga go dibayoya ana tuta goi Keni ina dibayoya
keuwoina maniyedi ikabidi ina vininabeso go, imedi
Yauwe yaina ikasaledi. E kina go
Ebeliyana nakae ina vininabeso moe
sipi bonatudiyao botomoya be
saabalidi, e ikaumatedi.



Ikavava, imedi Yauwe yaina ikasaledi. Yauwe igitedi, e Ebeli be ina vininabesoyadi iuyaonedidi go, Keniyana be ina vininabesoyadi geya iuyaonedita.

Tuwo Keni gamona igoyo toina, e kubuna ipulu.



E tuta tayamo Keni siyana Ebeli ilatuwoko idigo kana,
'Tāna yoyowo.' Tuwo moitamo sina yoyowo goi go,
tutayana amoko goi sikaaiyaka, e Keniyana itaoya,
siyana Ebeli ikaumate.



E Yauwe Keni ilatuwoko idigo kana, 'Siyam Ebeli nako?' 'Seki, geya ayagoiyeta. Manakae? Yau siyagu ana tomatakavata?' Keniyana kaena. E Keni itaoya Yauwe matana goi isowóduwo ina asa yoina Nodi; moe Ideni bomatu dadavina.



E Adama monena taiyao aiyuwaina simasisimna, e ikéuwama, ivenátuna natuna koroto. Monenayana idigo kana, 'Yaubada natugu ivinigu Ebeli ana katumapu unana Keni ikaumate.'
Tauna natuna ivayou Seti.



Seti ana bíbina mlina, Adamayana ikaaiyaka tala ana badabada eita andedi (800) tuwaina. Ego amo talayadi goi natunao koroto be vevina liliudi sibíbina. Tauyana yawoina ana madabokina moe tala ana badabada nain andedi teti (930), e ikámasa.



E Yauwe ikandosobu tomota idi goyo igitedi
sivakaigaga be nakae tuta liliuna idi
nuwogau liliudi nuwodi goi sigoyo.
Tuwo idigo kana, 'Ategu igeda guna
madágina pasina.



Neta boi geya aodugudita! Tauna tauyadi boi aodugudi ame bei asamatedi, tomota, yoguyogu, dogoi daladalaidi be nakae mánuwo. Geya kada tayaamo poyapoya goi bei ikaaiyaka geya.'



E kina go Nowa ituli, Yauwe ikanuwoiye.
Nowayana natunao koroto adi taito: Semi
be, Em be nakae Diyepeta.



Ame moitamo. Yaubada
imatakoiyeda ame nakae: Natuna
kaakesaina ikasale bego avatau neta
inumise, bei geya ikamasete, go
sem maa yawoina vata.



Roma 3:23 Madabokiida, Diyuu be Totuyoyowo, bogina tagoyo, e Yaubada ana tomoeeyalina tapoikiki bego yaida goi itakanukanunu go, geya itoboinedeta.

Roma 6:23 Moe moitamo. Goyo ana katumapu moe ámasa go, Yaubada ina yabobona iviniibesoida moe yawoida vata ida spwagógana ida Tomoya Yeisu taiyao pasina.

Iberiu 9:27 Kita tomota liliuda ada lovina ikaaiyaka bego sivatayamo bei takámasa namlieta takínona ana tuta.

Epeso 2:8,9 Moitamo. Yaubada ina kanuwóiya goi bogina iyaveda numisa pasina go, yavayana unana moe geya kita toinida ida guinuwa goi geya. Moe Yaubada ina yabobona goi. Geya ida guinuwa goi geya, govila bei tagágasa.



Roma 10:9,10 bego neta sopada goi takatomoyae kina Tomoya be nakae ateda goi tanumisa bego Yaubada tokámasa yaidi goi ikaitáoe, e ada yava bei tababane. Moitamo. Ateda goi tanumisa, tauna kita Yaubada matana goi kiboobosida. E sopada goi Yeisu takatomoyae bego Tauyana Tomoya, e bei ada yava tababane.

Iyoni 3:16,17 Ame moitamo. Yaubada imatakoiyeda ame nakae: Natuna kaakesaina ikasale bego avatau neta inumise, bei geya ikamaseta, go sem maa yawoina vata. Moitamo. Yaubada Natuna ietune ima poyapoya ame goi geya kada bego da poyapoya itakinoida toogoyoida ida goyo pasidi geya, go sem bego Natunayana goi iyaveda.



1 Iyoni 5:11-13 Ina talavaitayana ame nakae: Yaubada yawoida vata bogina ivinida go, yawoida vatayana ida Natuna taiyao pasina tababane. Avatauwa neta Yaubada Natuna taiyao siispwagógana, maa yawoidi vau. Go avatauwa neta Yaubada Natuna taiyao geya sispwagogoneta, e geya yawoidimo. Ame livalayadi bogina aginidi siwo yaimi bego komi Yaubada Natuna ana tonumisayao bei koyagoi bego bogina maa yawoimi vata.



Aba Vatowo 3 - 6

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: Bob Davies; Tammy S.

Gumawana Bible (gvs) © 2019, Wycliffe Bible
Translators, Inc. All rights reserved.

<https://www.bible.com/bible/3576/MAT.1>

©2026 Bible for Children, Inc.

www.M1914.org

www.bibleforchildren.org

